

جمعية الدعوة والإرشاد وتوعية الجاليات بالزلفي مترجم تَعَلَّم الإسلام – السيرة النبوية – اللغة الفلبينية

Aralin 1

الدرس الأول

Ang Kalagayan ng Arabia Bago ang Islam

Ang Paganismo noon ang siyang umiiral na relihiyon sa mga Arabe, at dahilan sa pagkakayakap nila sa Paganismo na suma-salungat sa matuwid na relihiyon ay binansagan ang panahon nila na *alJāhiliyah*: ang Panahon ng Kamangmangan. Kabilang sa pinakabantog sa mga diyus-diyusan na sinasamba nila noon bukod pa kay Allah ay sina Allāt, Al'uzzá, Manáh at Hubal. Subalit may-roong mga Arabe na yumakap sa Judaismo, o Kristiyanismo, o Mazdaismo.¹ May matatagpuan din sa kanila na mangilan-ngilang individuwal na nanatiling yumayakap sa Likas na Monoteismo, ang kapaniwalaan ni Abraham.

Tungkol naman sa buhay pang-ekonomiya, ang mga *Badawi*² ay umaasa nang lubusan sa yamang panghayupan na umaasa sa pagpapastol. Ang inaasahan naman ng buhay pang-ekonomiya ng mga *Hādir*³ ay ang pagsasaka at ang pangangalakal. Bago dumating ang Islam, ang Makkah ang pinakamalaking lungsod pangkalakalan sa Arabia. Mayroon na ring mga pamayanang may kabihasan sa maraming rehiyon gaya ng Madinah at Taif.

Tungkol naman sa kalagayang panlipunan, ang kawalang-katarungan ay laganap. Ang mga karapatan ay nilalabag. Inilili-bing nang buhay ang mga batang babae. Nilalapastangan ang mga karangalan. Nilalabag ng malakas ang karapatan ng mahina. Nag-aasawa sila nang walang takda. Ang pangangalunya ay laganap. Ang mga digmaan sa pagitan ng mga lipi ay nangyayari dahil sa napakababaw na mga dahilan, pati na sa mga anak ng isang lipi.

Iyon ay isang dagliang sulyap sa reyalidad ng Arabia bago lumitaw ang Islam.

Ang Anak ng Dalawang Handog

Ang mga Quraysh ay nagmamalaki noon kay 'Abdulmuttalib, ang lolo ni Propeta Muhammad (SAS), sa pagkakaroon ng mga supling at yaman. Kaya namanata si 'Abdulmuttalib na talagang kung pagkakalooban nga siya ni Allah ng sampung anak na lalaki ay iaalay niya ang isa sa kanila bilang handog sa mga diyos. Natu-pad sa kanya ang ninais niya; napagkalooban siya ng sampung anak na lalaki. Ang isa sa kanila ay si 'Abdulláh, ang ama ng Propeta (SAS). Noong ninais na ni 'Abdulmuttalib na tuparin ang panata ay gumawa siya ng isang palabunutan sa pagitan ng mga anak niya. Nabunot si 'Abdulláh. Ngunit noong ninais niya na ialay ito ay sinalungat siya ng mga tao upang mapigilan siya nang sa gayon ay hindi iyon maging isang kalakaran sa mga tao. Pag-katapos ay nagkaisa sila na magsagawa ng palabunutan sa pagitan ni 'Abdulláh at ng sampung kamelyo na magiging pantubos sa kanya. Noong isinagawa ang palabunutan ay nabunot si 'Abdulláh. Kaya dinoble nila ang bilang ng mga kamelyo ngunit nabunot na naman siya. Kaya nagsimula silang magdagdag sa bilang ng mga kamelyo. Ang nabunot palagi ay si 'Abdullah hanggang sa uma-bot ang bilang ng mga kamelyo sa isandaan, at saka nabunot ang mga kamelyo. Kinatay ni 'Abdulmuttalib ang mga ito at natubos ang anak niya na si 'Abdullah sa pamamagitan ng mga ito.

Talaga namang si 'Abdulláh ang pinakamalapit sa puso ni 'Abdulmuttalib sa mga anak nito, lalo na nang matapos ang pag-tubos. Nang nagbinata na si 'Abdulláh ay pumili para sa kanya ang ama niya ng isang dalagang kabilang sa liping Zuhrah, na ang pangalan ay Áminah bint Wahb. Ipinakasal siya ng ama sa dalagang ito. Nagdalang- tao si Áminah. Matapos ang tatlong buwan ng pagdadalang- tao ni Áminah ay lumisan si 'Abdulláh kasama ng isang karaban napangkalakal patungong Shám.⁴ Habang nasa daan pauwi ay dinapuan siya ng karamdaman kaya tumigil siya sa Madinah sa piling ng mga tiyuhin niya sa ina na kabilang sa liping anNajjār. Doon na siya binawian ng buhay at inililing.

Ang Kapanganakan ng Sugo (SAS)

Nalubos ang mga buwan ng pagdadalang- tao. Isinilang siya nang araw ng Lunes, subalit walang natitiyak na pagtatakda sa araw at buwan ng kapanganakan niya. Sinasabi na siya ay ipina-nganak sa ika-9 ng buwan ng Rabi'ul'awwal. Sinasabi rin na sa ika-12. Sinasabi pa na sa buwan ng Ramaḍán. May nagsasabi ng iba pa roon. Iyon ay noong taong 571 C.E. Ito ang taon na tina-tawag na Taon ng Elepante.

¹ Mago ang isa pang tawag sa isang Mazdaista na kaanib ng Mazdaismo. Ang relihiyong Mazdaismo ay isang anyo ng Zoroasterianismo, ang relihiyong itinatag ni Zoroaster o Zarathustra na Persiano. Ang Tagapagsalin.

² Ang mga Arabeng disyerto na namumuhay sa disyerto at walang pirming bahay.

³ Ang mga Arabeng nakatira sa isang nayon o bayan at may pirming bahay.

⁴ Ang rehiyon na binubuo sa kasalukuyan ng Syria, Palestine, Lebanon, at Jordan.